

## ՄԱՐԳԻՆԱԼՈՒԹՅՈՒՆՆ ԻԲՐԵՎ ՏՐԱՆՍՖՈՐՄԱՑԻՈՆ ՀԱՍԱՐԱԿՈՒԹՅԱՆ ՀԻՄՆԱԿԱՆ ԲՆՈՒԹԱԳՐԵՐԻՑ ՄԵԿԸ

### *Նախրա Հակոբյան*

Տնտեսական կյանքի սոցիալ-մշակութային, սոցիալ-քաղաքական ար-խայիզացիան և անիշխանության տարածումը պայմաններ են հանդիսա-նում զանգվածային մարգինալացման համար: Մարգինալացումը կապված է հասարակության մեջ տեղի ունեցող ճգնաժամերի, կառուցվածքային փոփո-խությունների և սոցիալական շարժունակության գործընթացների հետ, որի արդյունքում փոխվում է քաղաքական մշակույթը, վարքագծի սոցիալ-մշա-կութային ձևերի ստերեոտիպերը, կազմավորվում են վարքի նոր ձևեր:

Մարգինալության երևույթները բնութագրական են և՛ կայուն, և՛ անցու-մային հասարակություններին: Մարգինալ գիտակցության դրսևորումներ են հանդիսանում ապատիան, արսենիզմը, նեղացկոտությունը, որոնք անիշ-խանության պայմաններում կարող են ունենալ բացասական հետևանքներ թե՛ հասարակության, թե՛ անհատի կյանքում:

Առանց մարգինալ երևույթների, մարգինալ խմբերի ու մարդկանց, մարգինալ սոցիալական դերերի, գիտակցության ու վարքագծի դրսևորում-ների՝ դժվար է պատկերացնել որևէ սոցիում: Ամեն մի հասարակության մեջ որպես մարգինալության հատկությունների կրողներ հանդես են գալիս ան-հատները, սոցիալական ու էթնիկական խմբերը և սոցիալական շերտերը: Այլ կերպ ասած՝ մարգինալությունը սոցիոմշակութային և սոցիալ-հոգեբա-նական երևույթ է, որը մշտապես եղել է պատմական զանազան հասարա-կությունների, սոցիալականության տարբեր տիպերի անբաժան ուղեկիցը:

Մարգինալության երևույթի ուսումնասիրությանը նվիրված գրակա-նության մեջ սովորաբար տարբերակվում են մարգինալության տարբեր տիպեր՝ էկոլոգիական (աշխարհագրական), սոցիալական, տնտեսական, մշակութային, քաղաքական, կրոնական, գաղափարական, էկզիստենցիալ և այլն, որոնք, հաշվի առնելով դրանց էությունն ու գործառույթները, ընդգր-կվում են հետևյալ մեծ խմբերի մեջ՝

- ա) կառուցվածքային (սոցիալական) մարգինալություն,
- բ) մշակութային (էթնոմշակութային) մարգինալություն,
- գ) սոցիալական դերերի մարգինալություն:

Մասնագիտական գրականության մեջ գոյություն չունի մարգինալու-թյան միասնական սահմանում: Ինչպես նշում է Ի.Պոպովան, մարգինալու-

թյուն հասկացությամբ սովորաբար նշանակում են հարաբերականորեն կայուն այն սոցիալական երևույթները, որոնք առաջանում են տարբեր մշակույթների, սոցիալական հանրույթների, կառուցվածքների փոխգործողության սահմանագծում, որի արդյունքում սոցիալական սուբյեկտների որոշակի մասը հայտնվում է դրանց սահմաններից դուրս: Ավելի հաճախ նկատի են առնվում մարզինալ, լուսանցքային սոցիալական խմբերը [1]: Օ.Օլշանսկու կարծիքով՝ «Հաճախ մարզինալություն հասկացությունը նշանակում է սոցիալական ենթախմբերի ներկայացուցիչների գիտակցության և վարքագծի գծերի ընդհանրությունը, որոնք այս կամ այն հանգամանքի շնորհիվ ի վիճակի չեն ինտեգրվել մեծ ռեֆերենտային հանրույթներում» [2]:

Հետազոտողների կարծիքով՝ մարզինալություն հասկացության ոչ միանշանակ ըմբռնումը պայմանավորված է հետևյալ հանգամանքներով.

ա) հասկացությունը գործածվում է տարբեր գիտությունների (փիլիսոփայություն, սոցիոլոգիա, սոցիալական հոգեբանություն, մշակութաբանություն, քաղաքագիտություն, տնտեսագիտություն և այլն) կողմից տարբեր իմաստներով կամ տարբեր մոտեցումների տեսանկյունից,

բ) կապված մարզինալության տիպերի հետ՝ այն օգտագործվում է տարբեր իմաստներով,

գ) հասկացության բովանդակության անորոշությունը դժվարացնում է բուն երևույթը սոցիումալոգիային գործընթացների համատեքստում ներկայացնելը:

Իզուր չէ, որ «մարզինալ անձ» հասկացությունը որոշ հետազոտողներ համարում են «սոցիոլոգիական ֆիկցիա»: Իսկ հետազոտողների մի մասը կարծում է, թե մարզինալությունն այնպիսի ընդհանուր հասկացություն է, որն ամեն ինչ ներառելով՝ ոչինչ չի բացառում, ուստի այն պետք է գործածել զգուշությամբ և միայն այն բանից հետո, երբ սահմանված լինեն նրա չափանիշները:

Սոցիոլոգիական գրականության մեջ առանձնացվում է մարզինալության ուսումնասիրության երկու մոտեցում: **Առաջին դեպքում** մարզինալության երևույթն ըմբռնվում է որպես հասարակության մեջ կառուցվածքային փոփոխության գործընթացում սոցիալական խմբերի և անհատների վիճակ (սոցիալական կարգավիճակների փոփոխություն, երբ խումբը կամ անհատը հայտնվում են երկու խմբերի կամ կառուցվածքների միջակայքում): **Երկրորդ դեպքում** մարզինալությունն ըմբռնվում է որպես սահմանային, լուսանցքային վիճակում գտնվող սոցիալական խմբերի բնութագիր:

Մարզինալության այսպիսի մեկնաբանության դեպքում որպես մարզինալներ հանդես են գալիս սոցիումի «հետնապահները» (աութսայդերները), հիմնականում «կյանքի հատակում» գտնվողները՝ թափառաշրջիկները,

յումպեն, գործագուրկ, հանցագործ տարրերը և սոցիալական կառուցվածքներում չներառված խմբերը: Խորհրդային շրջանում, երբ հասարակական երևույթների վերլուծությունն իրականացվում էր մենիշխան մարքսիստական փիլիսոփայության ու մեթոդաբանության դիրքերից, մարզինալությունը հիմնականում համարվում էր կապիտալիստական երկրներին բնորոշ երևույթ: Մարզինալ էին համարվում սոցիալական այն խմբերը, որոնք «չեն մասնակցում արտադրական գործընթացին, չեն կատարում հասարակական գործառույթներ, չունեն սոցիալական կարգավիճակ և գոյատևում են այն միջոցների հաշվին, որոնք կամ ձեռք են բերվում ընդունված նորմերի շրջանցմամբ, կամ տրվում են հասարակական ֆոնդերից, ունևոր դասակարգերի կողմից՝ հանուն քաղաքական կայունության» [3]: Այս դեպքում մենք գործ ունենք մարզինալության ֆունկցիոնալ կողմի հետ:

Տ.Պարսոնսը և Ռ.Մերտոնը փորձում էին մարզինալությունը կապել հանցավորության և սոցիալական կյանքի այլ բացասական երևույթների հետ: Հետևելով նրանց՝ Վ.Մադկովը կարծում է, թե «մարզինալությունն, անկասկած, հանցագործության պատճառներից մեկն է: Մարզինալության և հանցագործության միջև եղած սերտ փոխկապակցվածությունը կասկածից վեր է և միանգամայն որոշակի: Տվյալ դեպքում խոսքը վերաբերում է ոչ այնքան նշված երևույթների փոխկապակցվածության աստիճանի քանակական ցուցանիշներին, վիճակագրական (կորելյացիոն և գործառութային) կախվածությանը, որքան որակական բնութագրերին» [4]: Որոշ հետազոտողներ մարզինալությունը համարում են քաղաքական ծայրահեղականության, արմատականության ակունք:

Ի տարբերություն սոցիոլոգիական մոտեցման, մարզինալության երևույթի փիլիսոփայական ըմբռնումը, կարելի է ասել, դեռևս մշակման փուլում է:

20-րդ դարի երկրորդ կեսից սկսած՝ եվրոպական փիլիսոփայության մեջ ձևավորվում է հետմոդեռնիստական ուղղությունը, որը զբաղեցնում է գիտակցված մարզինալ դիրքորոշում՝ դրանով իսկ հակադրելով իրեն տիրապետող դասական փիլիսոփայության դիսկուրսին: Հետմոդեռնիստները ներմուծում են մարզինալ սուբյեկտ, մարզինալ գիտակցություն, մարզինալ տարածություն, մարզինալ գոյություն հասկացությունները: Մարզինալ սուբյեկտի դերում հանդես են գալիս հեղափոխականը, խենթը, կախարհը, արվեստագետը, համասեռամուլը, շիզոֆրենիկը, այլ խոսքով՝ բոլոր նրանք, ովքեր հետևողականորեն արժեզրկում են օրենքը, կառուցվածքը, տրամաբանությունը, կրոնը, բարոյականությունը, բանականությունը, այսինքն՝ այն ամենը, ինչը կարող է հանդես գալ որպես ճնշման միջոց [5]:

Ռ.Փարկը, առաջադրելով «մարզինալ անձ» հասկացությունը, այն դի-

տում էր իբրև միջմշակութային գործընթացների արդյունք: Անձի այդ տիպը հանդես է գալիս այն ժամանակ և այնտեղ, որտեղ ռասաների և մշակույթների կոնֆլիկտից սկսում են ի հայտ գալ նոր հանրություններ: Մարգինալ անձը հայտնվում է երկու մշակութային աշխարհների միջակայքում: «Բարոյական և հոգեբանական խռովքը», որը մշակութային փոխշփումների արդյունք է, ավելի բացահայտ ձևերով է դրսևորվում մարգինալ անձի հոգեկանում: Փարկը մարգինալ անձին դիտում է որպես ակուլտուրացիայի (Ա.Նալչաջյանն առաջարկում է «ակուլտուրացիա» հասկացությունը թարգմանել «մշակութային սոցիալականացում») գործընթացի հավելյալ արդյունք, երբ տարբեր ռասաների ու մշակույթների միջև ստեղծվում են որոշակի փոխհարաբերություններ: Փարկը մարգինալությունը դիտարկում է ոչ միայն որպես անձի կարգավիճակ երկու սոցիալական կամ մշակութային խմբի միջակայքում, այլև որպես միաժամանակ երկու խմբին պատկանելու բնութագիր, որի հետևանքով տեղի է ունենում անձի կարգավիճակի փոփոխություն: Վերլուծելով միգրացիան՝ Փարկը վատատեսորեն է գնահատում մշակութային հիբրիդներին ոչ թե այն պատճառով, որ ներգաղթած մարգինալը չի կարող կտրվել իր անցյալից և հարմարվել նոր մշակութային միջավայրին, այլ՝ որ մշակույթներն անթափանցելի ու անփոխանցելի են և հնարավոր չէ մնալ դրանց սահմանագծում. մարգինալ մարդը հարկադրված է ընտրել դրանցից մեկը կամ ընթանալ երրորդ ճանապարհով: Մարգինալ անձի ձևավորման նախապայմանն անորոշ, ճգնաժամային վիճակի տևականությունն է: Որքան այդ վիճակը երկար է տևում, այսինքն՝ անձը մնում է չհարմարվածության (դեզադապտացիայի) մեջ, այնքան կայունանում են այն գծերը, որոնք բնորոշ են մարգինալ անձին:

Զարգացնելով Փարկի հայացքները՝ Է.Սթոունքվիստը «Մարգինալ մարդ» աշխատության մեջ մարգինալ մարդուն համարում է սոցիալական սուբյեկտ, որը ներառված է մշակութային կոնֆլիկտում: Այդպիսի մարդը գտնվում է երկու մշակույթների սահմանագծում, բայց չի պատկանում դրանցից որևէ մեկին: Մարգինալ անձի երկփեղկվածությունը պայմանավորված է սովյալ հասարակության մեջ առկա սոցիալական և ռասայական, էթնիկական հակասություններով: Է.Սթոունքվիստը մարգինալ մարդուն համարում է «առանցքային անձ» (*key-personality*) մշակութային փոխշփումներում, որը, ձգտելով միավորվել հասարակության գերիշխող, ռեֆերենտային խմբին, հաղորդակցվում է դրա մշակութային արժեհամակարգի տարրերին և ընդունում այդ մշակույթի չափանիշները: Արդյունքում՝ ձևավորվում է «մշակութային հիբրիդ», որը հայտնվում է մարգինալ վիճակում. մի կողմից՝ գերիշխող խմբի սահմանագծում, որը նրան համարում է օտար, մյուս կողմից՝ հին խմբի ծայրամասում (*периферия*), որն իրենից հեռացածին համարում է

«ուրացող»: Ի տարբերություն Ռ.Փարկի, Է.Սթոունքվիստը ուշադրություն է դարձնում մարզինալացման գործընթացի բացասական հետևանքներին:

Է.Սթոունքվիստի կարծիքով՝ անձի սոցիալական, հոգեկան, մտավոր ու զգացմունքային կողմերի փոխակերպման գործընթացը տևում է շուրջ 20 տարի: Նա առանձնացնում է մարզինալ անձի էվոլյուցիայի երեք փուլ: **Առաջին փուլում** մարդը դեռ չի գիտակցում, որ ինքը հայտնվել է մշակութային կոնֆլիկտի մեջ և չի նկատում, որ աստիճանաբար «յուրացնում» է գերիշխող խմբի մշակույթը: **Երկրորդ փուլում** կոնֆլիկտը գիտակցվում է, և հոգեբանական իմաստով մարդը վերածվում է «մարզինալ անձի»: **Երրորդ փուլում** մարզինալ անձը հաջող կամ անհաջող փորձեր է կատարում հարմարվելու կոնֆլիկտային իրավիճակին: Հաջող հարմարման դեպքում նա դուրս է գալիս մարզինալ վիճակից, դառնում «նորմալ» մարդ, իսկ անհաջողության դեպքում մնում է չհարմարված (դեգադապտացված) վիճակում՝ դրան բնորոշ հոգեախտաբանական բարդություններով [6]:

Մարզինալ անձի մասին Ռ.Փարկի և Է.Սթոունքվիստի գաղափարները հիմք հանդիսացան նոր մեկնաբանությունների, տեսական ու փորձարարական հետազոտությունների համար:

Այս կապակցությամբ ուշադրության է արժանի ամերիկացի հետազոտող Բ.Ջ.Մանչինիի մոտեցումը, որում ոչ միայն համադրված են մարզինալության տարբեր տիպերի ուսումնասիրության սոցիոլոգիական և սոցիալ-հոգեբանական կողմերը, այլև մարզինալությունը բացատրելու համար օգտագործված են հարմարման հոգեբանական տեսության դրույթները: Մարզինալության երևույթի բացատրման համար նա ներմուծում է էությունական-գործընթացային (*essential/processual*) հասկացությունը: Մարզինալության աստիճանը Մանչինի կապում է անհատի կամ խմբի զբաղեցրած մարզինալ դիրքի ստատիկ և դինամիկ վիճակների հետ: Մարզինալության առաջին տիպը պայմանավորված է որոշակի կառուցվածքում զբաղեցրած դիրքով, երբ անհատը դառնում է մարզինալ «ըստ սահմանման»:

Մանչինին առաջարկում է մարզինալության աստիճանի (խորության) որոշման հետևյալ չափորոշիչները.

- ա) իրադրության փոփոխականությունը,
- բ) իրադրության նշանակալիությունը,
- գ) իրադրության տեսանելիությունը,
- դ) մշակութային կոնֆլիկտը,
- ե) խմբային կոնֆլիկտը,
- զ) նախկին խմբի դիրքորոշումը,
- է) «ընդունող խմբի» վերաբերմունքը,
- ը) նույնացման ուղղվածությունը,
- թ) կամավոր (գիտակցական) դիրքորոշումը [7]:

Մարզինալության երևույթի համակողմանի, մասնավորապես՝ հոգեբանական տեսանկյունից ուսումնասիրության նշանակությունը մեծանում է հատկապես փոխակերպվող հասարակություններում, որտեղ քաղաքական, տնտեսական, սոցիալական և մշակութային վերակառուցումների հետևանքով կազմալուծվում են նախկինում կայուն հասարակական կառուցվածքները, սոցիալական հարաբերությունների համակարգը, և դրանց տարրերը՝ սոցիալական ինստիտուտները, սոցիալական խմբերը և անհատները, հայտնվում են սահմանային, միջանկյալ, անցումային վիճակում: Որոշ իմաստով մարզինալությունը դառնում է փոխակերպվող հասարակության հիմնական բնութագրերից մեկը:

Կայուն հասարակություններում նույնպես գոյություն ունեն մարզինալության առաջացումը պայմանավորող նախադրյալներ: Այս իմաստով այն ամեն մի սոցիալական փոխակերպմանն ուղեկցող երևույթ է, հասարակության սոցիալական գործառույթներից մեկը, քանի որ հնարավոր չէ պատկերացնել հասարակություն, որում չեն կատարվում որոշակի փոփոխություններ: Մակայն համեմատաբար կայուն հասարակություններում առկա է սոցիալական հարաբերությունների կարգավորված ցանց, որն ապահովում է մարդկանց սոցիալ-մշակութային միավորվածության ու համագործակցության բարձր աստիճան: Նման դեպքերում մարդիկ իրենց զգում են հասարակական ամբողջի օրգանական մասը: Օրինակ, նախկին Խորհրդային Միությունում ստեղծվել էր միասնական սոցիալ-քաղաքական, սոցիալ-մշակութային և բարոյահոգեբանական դաշտ, որի արժեքները համընդհանուր բնույթ ունեին: Խորհրդային մարդկանց մեծամասնությունը, ընդհանուր առմամբ, իրեն մեկուսացած, հասարակությունից օտարված չէր զգում. բնակչության գերիշխող մասը ներառված էր գործող սոցիալ-տնտեսական կառույցների, աշխատանքային գործունեության տարբեր ոլորտների մեջ:

Խորհրդային շրջանում մարզինալության և մարզինալների առաջացման համար առկա էին հետևյալ նախադրյալները.

- բնակչության զանգվածային տեղափոխությունները (երկրի ինդուստրացման հետևանքով գյուղական բնակչության արտահոսք դեպի քաղաքներ, խոպան հողերի յուրացում, Միբիրում նոր քաղաքների ու արտադրությունների հիմնում), որոնք չէին ապահովվում համապատասխան սոցիալական, կենցաղային ու մշակութային ենթակառուցվածքներով,
- թաքնված սոցիալական շերտավորումը, էթնիկական հակասությունները,
- տոտալիտար գաղափարախոսության իշխող դերը, քաղաքացիական հասարակության տարրերի բացակայությունը, անձի և պետության միջև ձևական հարաբերությունները, օտարվածության առկայությունը:

Ինչպես հարաբերականորեն կայուն, այնպես էլ փոխակերպվող հասարակությունում մարզինալության դրսևորմանը նպաստում են բազմաբնույթ օբյեկտիվ և սուբյեկտիվ գործոններ: Հետխորհրդային անցումային հասարակություններում մարզինալության առաջացման օբյեկտիվ պատճառներից են. պետաքաղաքական, սոցիալ-տնտեսական, սոցիալական կապերի համակարգերի փլուզումը, սոցիալական և էթնիկական կոնֆլիկտները, պատերազմները, արտագաղթը և այլն:

Մարզինալության առաջացման համար առաջին և կարևորագույն գործոն է զանգվածային գործազրկությունը, ինչը սոցիալ-քաղաքական հարաբերությունների և հասարակական կապերի փլուզման ածանցյալ է: Վերջինիս հետևանքով ոչ միայն իջնում է հասարակության կենսամակարդակը, այլ նաև տեղի է ունենում բնակչության համատարած աղքատացում:

Այսպիսի երկիմաստ, անորոշ ու անկայուն պայմաններում արագորեն ընթանում է հասարակության գրեթե բոլոր ոլորտների մարզինալացման գործընթացը: Դրա առանձնահատկությունն այն է, որ մարզինալ խմբերը կամ մարզինալները գործում են ոչ թե սոցիալական գործունեության ծայրամասերում, այլ ամենուր՝ ընդգրկելով կյանքի գրեթե բոլոր ոլորտները: Եթե կայուն հասարակություններում մարզինալացման երևույթները վերահսկվում են, ինչ-որ տեղ նույնիսկ կարգավորվում, ապա արագընթաց փոխակերպումների մեջ գտնվող անցումային հասարակություններում մարզինալացման գործընթացներն ունենում են տարերային, անկանխատեսելի ու անվերահսկելի բնույթ:

Անցումային հասարակություններում փոխվում են մարզինալության դրսևորման ծավալները, բովանդակությունը, որակները և ոլորտները: Բնակչության մեծամասնության վերածումը մարզինալ զանգվածի ստեղծում է սոցիալական իրականության որակապես նոր իրավիճակ: Ե.Ն.Ստարիկովի կարծիքով՝ հետամբողջատիրական հասարակության սոցիալական կառուցվածքում գործնականում մարզինալացվում են սոցիալական բոլոր խմբերը, ինչի հետևանքով ջնջվում են մարզինալի և ոչ մարզինալի միջև եղած տարբերությունները [8]: Ըստ նրա, մարզինալությունը հասարակության սոցիալական կառուցվածքի շարժունության, անորոշության վիճակի արդյունք է: Այս տեսակետը վիճարկելի է, որովհետև մարզինալությունը միանշանակորեն նույնացվում է մոբիլության, անցումայնության հետ: Մինչդեռ մարզինալությունը ենթադրում է մոբիլության առկայություն, բայց ամեն մի մոբիլություն դեռևս մարզինալություն չէ:

Ամեն դեպքում, փոխակերպվող հասարակության մեջ մարզինալությունն, իբրև երևույթ, լայն ընդգրկում է ունենում: Եթե մարզինալացումը ստանում է զանգվածային բնույթ, ապա դրա արժեքներն ու դիրքորոշումները

թափանցում են նաև այնպիսի մարդկանց գիտակցության մեջ, որոնք սոցիալական կառուցվածքներում դեռ պահպանում են իրենց կարգավիճակը:

Անցումային հասարակությունը, որտեղ սոցիալական շարժունության տեմպերը բարձր են, իր իսկ բնույթով նպաստավոր միջավայր է ստեղծում մարզինալ երևույթների ինտենսիվ դրսևորումների համար: Անցումային հասարակության մեջ մարզինալության առաջացման ակնհայտ ցուցանիշը զուգահեռականության երևույթի դրսևորումն է. մի կողմից՝ իներցիայի ուժով շարունակում են գործել հին ինստիտուտները և դրանց բնորոշ արժեքներն ու հարաբերությունները, մյուս կողմից՝ փոխակերպման գործընթացների հրամայականով պայմանավորված սոցիալական նոր ինստիտուտները և միջանձնային նոր հարաբերությունները: Անկախ իրենց կամքից ու ցանկությունից՝ օբյեկտիվ պատճառներով մարդիկ հայտնվում են երկու իրականության, երկու տարբեր սոցիալ-մշակութային աշխարհների հատման գոտում, և նոր իրողությունների ազդեցությամբ նրանց մեջ ձևավորվում է երկակի վերաբերմունք շրջապատող ամեն ինչի նկատմամբ: Ստեղծված իրադրությունները մարդկանց ստիպում են մտնել մինչ այդ իրենց անձանոթ սոցիալական կապերի ու դերերի մեջ: Սկսվում է զուգահեռաբար գոյատևող հին և նոր իրողությունները համատեղելու հոգեբանական տանջալից գործընթաց: Երկակի դերակատարումները նախադրյալներ են ստեղծում երկփեղկված աշխարհայացքի, երկակի սոցիալական դիրքորոշումների ձևավորման համար:

Փոխակերպվող հասարակությունում քաղաքական ու տնտեսական փոփոխություններն ուղեկցվում են սոցիալ-հոգեբանական բնույթի փոփոխություններով. տեղի են ունենում արժեքների վերաիմաստավորում, աշխարհայացքային դիրքորոշումների արժեզրկում, կարծրատիպերի փոխակերպումներ, կյանքի իմաստի փնտրտուք, սոցիալական կապերի խզում, միջանձնային հարաբերությունների ապամարդկայնացում, բարոյականության անկում, սոցիալական կարգավիճակի, դիրքի ու դերային վարքի փոփոխություններ: Արդյունքում՝ մարդկանց մեծամասնության մոտ տեղի է ունենում սոցիալական նույնության ճգնաժամ, որն արտահայտվում է մարդու՝ սոցիալական պատկանելության դրական ընկալման կորստով:

Անցումային հասարակության մեջ մարզինալության դրսևորման մյուս առանձնահատկությունն այն է, որ սոցիալական շարժունության (թե՛ ուղղահայաց և թե՛ հորիզոնական) հետևանքով մարզինալի և ոչ մարզինալի սահմանները դառնում են հեղեղուկ, վերանում է դրանց միջև գոյություն ունեցող տարածաժամանակային հեռավորությունը, կամ էլ մեծանում է ոչ մարզինալից մարզինալի վերածվելու հնարավորությունը: Բնակչության մեծ մասի մարզինալացումը նշանակում է նաև սոցիալական շեր-



տերի և խմբերի միջև սահմանների խառնում, միջանկյալ, դժվար նույնացվող խմբերի առաջացում: Սոցիալական շերտավորման գործընթացներն էական փոփոխություններ են առաջ բերում մարդկանց սոցիալական կարգավիճակներում՝ նոր պայմաններ ստեղծելով նրանց սոցիալական շարժունության համար:

Անցումային հասարակության մեջ մարզինալացման առանձնահատկություններից մեկն էլ այն է, որ ավանդական մարզինալ խմբերի հետ միասին սոցիալական կառուցվածքների ծայրամասում են հայտնվում նոր մարզինալներ, որոնք ունեն բարձրագույն կրթություն, բարձր մասնագիտական որակավորում, պահանջմունքների զարգացած համակարգ, մեծ սոցիալական սպասումներ և քաղաքական ակտիվություն:

Չպետք է կարծել, թե մարզինալությունը դրսևորվում է միազիժ և հավասարաչափ: Եթե առանձնացնենք մարզինալության մի քանի մակարդակ (մակրո, միկրո և կոնկրետ իրավիճակների հանդեպ անձի վերաբերմունքի) և հաշվի առնենք տարածաժամանակային համատեքստը, ապա կարող ենք նշել, որ յուրաքանչյուր մակարդակում նկատվում են մարզինալության դրսևորման անհամաչափություն և հակասականություն:

Անցումային հասարակությունում ապրող մարդկանց սոցիալ-հոգեբանական «հիվանդություններից» են դառնում անորոշությունը, անվստահությունը, հոռետեսությունը, ագրեսիան, տագնապն ու վախը: Տիրապետող է դառնում սոցիալ-հոգեբանական անբավարարվածության զգացումը: Ընկճված վիճակներ, անկումային տրամադրություններ, անվստահություն վաղվա օրվա նկատմամբ, սպասումների չիրականացում, ֆրուստրացիաներ, սթրեսներ ու կոնֆլիկտներ, նիհիլիստական վերաբերմունք ցանկացած զաղափարի և իրողությունների հանդեպ, վերակողմնորոշում դեպի արկածախնդրական, գործունեությունը՝ ահա անցումային հասարակության մարդկանց սոցիալ-հոգեբանական պատկերի ոչ լրիվ բնութագիրը:

Փոխակերպվող հասարակությունում մարզինալացման մակրոգործընթացն անցնում է որոշակի փուլերով, որոնց ընթացքում ձևավորվում են տարբեր կարգի մարզինալ խմբեր, շերտեր և ստեղծվում են տարբեր մարզինալ իրավիճակներ: Որոշ իմաստով մարզինալացման փուլերը համընկնում են անցումային հասարակության զարգացման փուլերին: Կարելի է առանձնացնել երեք փուլ:

**Առաջին փուլում** զարգացման նոր միտումները ծագում են հնի գերիշխանության պայմաններում: Այս փուլում հեղափոխականորեն մերժվում է հինը, ընթանում է հին կարգերի, սոցիալական կառուցվածքների ու րարբերությունների հեղինակազրկման գործընթաց:

**Երկրորդում** առաջանում է զուգահեռականության երևույթը, այսինքն՝

ամենուր ընթանում է հնի և նորի պայքար, հասարակական կյանքն աչքի է ընկնում անկայունությամբ, սոցիալական ցնցումները հաջորդում են իրար:

**Երրորդ փուլում** զարգացման նոր միտումները դառնում են գերիշխող, նոր կառուցվածքներն սկսում են գործել, և կայունության միտումները դառնում են անշրջելի, սակայն հինը դեռևս շարունակում է իր գոյությունը:

**Անցումային շրջանի առաջին փուլում** մարզինալացման գործընթացում ներառվում են այն մարդիկ, ովքեր սոցիալական կառուցվածքների փոփոխության հետևանքով կորցրել են իրենց աշխատանքն ու սոցիալական կարգավիճակը, սակայն դեռ հույս ունեն, որ շուտով կգտնեն իրենց մասնագիտությանը համապատասխան նոր աշխատանք: Այս փուլում մարդիկ դեռ զբաղված են անցյալի քննադատությամբ, վստահ են, որ փոփոխությունները կբարելավեն իրենց վիճակը: Իդեալականացնելով ներկան (դրա զարգացման բացասական միտումները, որպես կանոն, կա՛մ չեն նկատվում, կա՛մ անտեսվում են)՝ նրանք դեռևս չունեն բացասական կանխատեսումներ: Ավելին, նրանք վստահ են, որ իրականացվող փոփոխությունները կբարելավեն իրենց վիճակը: Այսպիսի մարդիկ դեռևս պահպանում են իրենց նախկին արժեհամակարգն ու դիրքորոշումները: Իրենց կարգազուրկ և գործազուրկ լինելը նրանք հակված են բացատրել իբրև պատահականության, օբյեկտիվ հանգամանքների արդյունք, ժամանակավոր երևույթ, կամ անփորձության, սեփական թերությունների և սխալների, անհաշվենկատ գործունեության, անբավարար ակտիվության հետևանք: Այդ մարդիկ առաջնորդվում են «մեր փողոցում էլ շուտով զարուն կլինի» ասացվածքով, ինչը նշանակում է, որ նրանք, թեև հայտնվել են անորոշ իրավիճակում, սակայն չեն կորցրել հույսը՝ վերագտնելու իրենց սոցիալական կարգավիճակը, դեռ վստահ են իրենց ուժերին, ինչպես նաև կյանքում կատարվող փոփոխությունների դրական արդյունքների հանդեպ:

Սակայն, հին կառուցվածքների ու կապերի փլուզումը, ժամանակավոր անորոշ ու անկայուն վիճակները չեն կարող չանդրադառնալ նրանց տրամադրության և ինքնագզացողության վրա: Վախը անհայտի, անորոշի հանդեպ ալեկոծում է նրանց հոգեկանը: Այդպիսի մարդկանց հոգեբանական վիճակի բնորոշ գծերից են դառնում սպասողականությունը, հուսահատությունը, անհանգստությունը, կասկածամտությունը և այլն: Այս վիճակի խորացման դեպքում կարող են առաջ գալ լուրջ հոգեբանական խախտումներ, որոնք կարող են հանգեցնել ինքնահարգանքի կորստի և հոգեկան ճգնաժամի: Համենայնդեպս, այս փուլում մարզինալացման միտումները հստակ չեն երևում՝ չգիտակցվելով արդեն մարզինալացման շրջապատույթի մեջ հայտնված մարդկանց կողմից:

**Երկրորդ փուլում** մարզինալացման գործընթացում ներառվում կամ,

ավելի ստույգ՝ արդեն մարզինալ են դառնում այն մարդիկ, ովքեր երկար ժամանակ լինելով կարգազուրկ և գործազուրկ՝ արդեն ճաշակել են գործազրկության բոլոր դառնությունները և գիտակցում են իրենց նոր կարգավիճակը: Տնտեսական ճգնաժամի և զանգվածային գործազրկության պայմաններում նկատելի է դառնում ուղղահայաց վարընթաց սոցիալական շարժունությունը, որը նշանակում է մարդկանց սոցիալական կարգավիճակների իջեցում: Օրինակ, մտավորականը, բարձր որակավորում ունեցող մասնագետը սոցիալական վարընթաց շարժունության պատճառով ստիպված զբաղվում են ավելի ցածր որակավորում պահանջող գործով: Եվ, հակառակը, տեղի է ունենում նաև ուղղահայաց վերընթաց շարժունություն, երբ նախկինում ցածր սոցիալական կարգավիճակ ունեցողները ձեռք են բերում բարձր սոցիալական կարգավիճակներ:

Ուղղահայաց վարընթաց շարժունության հետևանքով խորանում է հասարակության ֆրոնտորացման և չհարմարվածության գործընթացը: Ավելի ցայտուն են դրսևորվում սոցիալական նույնության ճգնաժամի սոցիալ-հոգեբանական հետևանքները: Հօդս են ցնդում կյանքի վերաբերյալ նախկինում ձևավորված պատկերացումները, խառնաշփոթություն և հակասություն է առաջանում ես-ի անցյալի, ներկայի (Գործող ես-ի) և ապագայի (Իդեալական ես-ի) միջև: Մարդկանց մեջ նկատվում է նախկին սոցիալական կարգավիճակին բնորոշ արժեքների ու դիրքորոշումների միախառնում նոր արժեքների ու դիրքորոշումների հետ, ինչն էլ բարերար հող է ստեղծում տարբեր տիպի կոնֆլիկտների, հակասությունների առաջացման համար: Հուսահատության ու ճգնաժամային իրավիճակներն ուղեկցվում են միայնակության, օտարվածության, ավելորդության զգացումների սրմամբ:

Եթե չեն բավարարվում մարդու հիմնային, առաջնային պահանջմունքները, ապա մարդը չի էլ ձգտում իր առջև դնել ավելի բարձր նպատակներ:

Երկարատև գործազրկության պայմաններում մարդը հայտնվում է ձանձրույթի իշխանության տակ: Ինչպես նկատում է Է.Ֆրոմը, եթե մարդը չի կարողանում պաշտպանվել ձանձրույթից, ապա իրեն պիտի զգա ճնշված ու ընկճված: Իսկ ճնշված, ընկճված մարդն իր ներսում զգում է, որ իբր ինքը կաթվածահար է եղել, որ իբր իրեն չի բավարարում այն, ինչ անհրաժեշտ է գործելու համար: Իր ներքին դատարկությունը լցնելու համար նա օգտագործում է ամեն ինչ: Նա պասիվ է, զգում է, որ ինքը չնչին արժեք ունի և այդ զգացմունքները ճնշում է սպառմամբ՝ վերածվելով սպառող մարդու [9]:

Նման մարդկանց մոտ ձևավորվում է մարզինալ արժեքների համակարգ, որին բնորոշ են ա) անհանդուրժողականությունը սոցիալական ինստիտուտների և մարդկանց հանդեպ, բ) հականորմատիվ վարքի դրսևորման ծայրահեղ ձևերը, գ) ապակառուցողականությունը, դ) անհատապաշտությունը, բարոյական ռեյաստիվիզմը, նիհիլիզմը:

Այդ ընթացքում հասարակության մեջ ավանդական մարզինալ խմբերի կողքին ձևավորվում են տարբեր կարգի նոր մարզինալ կառուցվածքային խմբեր, որոնք «կենտրոնի» կամ սոցիալական նորմալի հանդեպ զբաղեցնում են «ծայրամասային, լուսանցքային» դիրք: Եթե նման մարդիկ քիչ թե շատ հարմարվում են իրենց վիճակին, ապա ձևավորվում է մարզինալ գիտակցություն՝ դրան բնորոշ արժեքներով ու դիրքորոշումներով: Մարզինալ խմբերը և մարդիկ փոխում են իրենց արժեհամակարգը, սոցիալական դիրքորոշումները և հարմարման ձևերը: Մարզինալ խմբերի բազմացման հետևանքով հանդես են գալիս ենթամշակույթներ և «հակամշակույթներ», որոնք կարող են ձևավորել տարբեր բնույթի այլընտրանքային շարժումներ: Պատահական չէ, որ անցումային հասարակության պայմաններում առաջանում են բազմատեսակ մարզինալ գաղափարական հոսանքներ, որոնք ուշադրություն են դարձնում այնպիսի թեմաների, ինչպիսիք են մահը, ողբերգությունը, աղետները, աշխարհի վախճանը, հոգեկան շեղումները, միստիկան, էզոտերիկան, սեռական ազատությունը և այլն:

Մարզինալ այն խմբերը, որոնցում ընդգրկվում են աղքատացող և լյուսպենացվող մարդիկ, ձեռք են բերում որոշակի հատկություններ: Նման մարդկանց մոտ աստիճանաբար չքանում են աշխատանքային դրդապատճառայնությունը և բարոյականությունը, ձևավորվում է սպառողական հոգեբանություն: Աշխատանքը դադարում է պահանջմունք լինելուց: Եթե դեռևս մնում են նպատակային ինչ-ինչ դիրքորոշումներ, ապա դրանք անմիջականորեն կապվում են միայն սպառման, նյութական միջոցների հայթայթման հետ: Իսկ ընդլայնվող սպառումը, որն այլևս կապված չէ աշխատանքային գործառույթների հետ, ստանում է հախուռն, անկազմակերպ բնույթ: Աստիճանաբար «կյանքի հատակը» գլորվող լյուսպենացված մարզինալ մարդը կորցնում է իր սոցիալական բոլոր կապերը: Ամբողջովին խզվում է կապը նախկին աշխատանքային կոլեկտիվի, ընկերական շրջապատի և ընտանիքի անդամների հետ: Մարզինալ անձը փնտրում է «իր նմաններին»՝ ստեղծելու համար նոր սոցիալական միջավայր: Այս խմբի հոգեւոցիալական առանձնահատկություններից են տնտեսական ու քաղաքական պասիվությունը և գիտակցված համոզմունքն առ այն, որ պետությունը կամ հասարակությունը պարտավոր են հոգալ իրենց նյութական կարիքները: Այսպիսի մարզինալ մարդիկ ընտրում են հարմարման բացասական մոդել, որի բնորոշ կողմերից են ժամանակավոր զբաղվածությունը, պատահական ձևերով փող վաստակելը, մուրալու տարբեր ձևերի կիրառումը, ուրիշների հաշվին ապրելը և այլն: Բացասական հարմարման մեկ այլ մոդել՝ սոցիալական պարագիտիզմի մոդելը, ընտրում են այն մարզինալները (հիմնականում՝ խաբեբաները, հանցագործ խմբերի անդամները և այլն), որոնք իրենց պահանջմունքները բավարարում

են միայն ուրիշների հաշվին, այն էլ՝ բռնությամբ, սպանություններով, անօրինական և հակաիրավական գործողություններով: Նրանց կողմից ընտրված սոցիալական վարքի ռազմավարությունն ուղեկցվում է ապակառուցողական հետևանքներով:

Չընդունելով հասարակության նոր արժեքներն ու նորմերը և ցանկանալով միայն սպառել հասարակական (ուրիշների) հարստությունը՝ լյուսպենացված և հանցավորության ճանապարհն ընտրած մարզինալ մարդը հոգեբանորեն պատրաստ է դառնում ագրեսիվ, քայքայիչ, ապակառուցողական հակահասարակական գործողությունների: Այդպիսի մարզինալները հաճախ ներառվում են հակահասարակական և հակապետական շարժումների մեջ, օգտագործվում տարբեր քաղաքական ուժերի կողմից:

Իրենց չնույնացնելով սոցիալական որևէ ոչ մարզինալ խմբի հետ, չընդունելով դրանց նորմերը՝ մարզինալները գրկում են իրենց հասարակական-քաղաքական կյանքին լիարժեք մասնակցության հնարավորությունից: Գտնվելով անտմիայի վիճակում, չկարողանալով կամ չցանկանալով որոշել իրենց լուսանցքային կեցության պատճառները, համարժեք կերպով չգիտակցելով սեփական շահերը՝ մարզինալները վերածվում են քաղաքական օբյեկտների: Մարզինալն այլևս չունի իր սեփական ինքնատիպ արժեհամակարգը, ուստի հախուռն ձևով սկսում է նմանակել, ընդօրինակել (հիմնականում խեղաթյուրված կերպով) իրեն քիչ թե շատ հասկանալի սոցիալական ու մշակութային նորմերը:

Մարզինալ մեկ այլ շերտ են կազմում զարգացած սոցիալական պահանջմունքներ ու սպասումներ, հիմնականում բարձրագույն կրթություն, բարձր որակավորում ունեցող մարդիկ, որոնք ամբողջությամբ դուրս չեն մղվել սոցիալական կառուցվածքներից՝ չկարողանալով, սակայն, իրագործել իրենց սոցիալական սպասումները: Նրանց մի մասին բնորոշ է ոչ միայն մարզինալ արժեքների հարմարվելը, այլև դրանք ձևափոխելը գաղափարականացման միջոցով՝ թե՛ առօրյա գիտակցության և թե՛ տեսության մակարդակում: Նրանք ընդվզում են, բողոքում «անարդար հասարակության» և «ոստիկանական պետության» դեմ, տեղի-անտեղի քննադատում են կատարվող բարեփոխումները, հռոշտեստրեն տրամադրվում փոփոխությունների, դրանք իրականացնող վերնախավի և, առհասարակ, ապագայի հանդեպ: Նման վիճակում ես-ի և արտաքին աշխարհի միջև հաստատվում են թշնամական հարաբերություններ, և տարերային, հախուռն անհատապաշտության դիրքերից մարդը հակադրվում է հասարակությանը՝ այդ ընթացքում կիրառելով պաշտպանական մի շարք հոգեբանական մեխանիզմներ:

Այդ կարգի մարզինալների մոտ ի հայտ են գալիս իմացական դեպրեսիվ համախտանիշի հատկություններ, որոնցից են՝

- անձնային բարձր սուբյեկտիվ նշանակություն ունեցող հատկությունների ցածր ինքնագնահատականը,
- ինքնամեղադրանքը և ինքնաքննադատությունը: Մարգինալ անձն իր անհաջողությունների համար նախնառաջ մեղադրում է իրեն,
- սեփական ուժերի հանդեպ հավատի կորուստը, բացասական սպասումները, անվճռականությունը կարևոր որոշումների ընդունման ժամանակ և այլն:

Արժեքային կողմնորոշումների փոփոխության հետ մեկտեղ ձևափոխվում են մարգինալ անձանց իմացական կարողությունները: Ուշադրության, ընկալման, հիշողության, մոռացման, մտածողության գործընթացները ձեռք են բերում բոլորովին այլ ուղղվածություն, որը պայմանավորված է նոր պահանջումների և նոր արժեքների բնույթով:

Հասարակական կյանքում տիրող քառսը, անդեմությունը նպաստում են անհատի ներուժի անկմանը: Ինքնավստահությունը կորցրած, ապակողմնորոշված անհատները հոգեկան հանգստություն և որոշակիություն ձեռք բերելու նպատակով սկսում են փնտրել ուժեղ «մենք»՝ ձգտելով իրենց նույնացնել որևէ խմբի (շարժման, կուսակցության) հետ:

Մարգինալ մարդն օտարվում է հասարակության մեջ ընդունված արժեքային նորմերից, մերժում գոյություն ունեցող սոցիալական կառուցվածքները, ամփոփվում իր ոլորտում, որն ընկալվում է իբրև իր կեցության տունը: Նա համակերպվում է իր մարգինալ կարգավիճակի ու դիրքի հետ, թաքնվում անտարբերության, անդեմության ու կրավորականության խրամատներում: Այդպիսի մարգինալ մարդկանց մի մասը, եթե խուսափում է մասնակցել հասարակական-քաղաքական գործընթացներին, ապա մյուս մասը մասնակցում է՝ ընտրելով սոցիալական վարքի ապակառուցողական տարբերակը: Աբսենթիստական դիրքորոշումն առավելապես որդեգրում են մտավորական (մշակութային) մարգինալները, որոնք կամավոր կերպով հակադրվում, ձեռնոց են նետում հասարակությանը:

Եթե այս մարգինալ մարդը ցուցաբերում է հասարակական ակտիվություն, ապա բնորոշվում է չարացածությամբ, անարխիզմով, ծայրահեղականությամբ, անհանդուրժողականությամբ ու վրեժխնդրությամբ:

Մարգինալության հիմնախնդիրը սերտորեն կապված է հարմարման խնդրի հետ: Գրականության մեջ տարբերակում են հարմարման երեք տիպեր.

- **Հարմարում միջավայրի վերափոխման ճանապարհով:** Հարմարվելու համար անձը ձգտում է ակտիվ կերպով վերափոխել իրականությունը, այն վերակառուցել իր պատկերացումներին և իդեալներին համապատասխան: Հարմարման գործընթացի մաս է կազմում ինքնանույ-

նացումը: Մարդու ակտիվությունը կարող է ուղղված լինել առավելագույնս շրջապատում հարմարվելուն՝ ի հաշիվ սեփական և անձնային ռեսուրսների:

- **Հարմարում ես-ի վերափոխման ճանապարհով:** Երբ անհատը զգում է, որ ի վիճակի չէ վերափոխել իրականությունը, փոխում է ինքն իրեն:
- **Հարմարում միջավայրից մեկուսանալու, «փախչելու» ճանապարհով:** Զգալով, որ չի կարող փոխել ո՛չ իրականությունը և ո՛չ էլ ինքն իրեն, անհատն ընտրում է ինքնամեկուսացման ճանապարհը:

Ա.Նալչաջյանն առանձնացնում է սոցիալ-հոգեբանական հարմարման երեք խումբ՝ ա) նորմալ հարմարում, բ) դեվիանտ, գ) ախտաբանական [10]:

Պետք է նկատել, որ հատկապես անցումային շրջաններում իշխանամիտությունը կարող է հանդես գալ ոչ միայն բացահայտ, այլև գաղտնի, զարտուղի ձևերով:

Անցումային շրջանում հարմարման այդ տիպը մարզինալացվող մարդկանց մոտ դրսևորվում է տարբեր ձևերով, որոնցից ամենատարածվածը ագրեսիվությունն է: Մարզինալության պայմաններում ավելի հաճախ է կիրառվում ագրեսիայի հոգեբանական պաշտպանական մեխանիզմը: Ագրեսիվ վարքի առաջացման հիմքում ընկած են սոցիալական բնույթի ֆրուստրացիաները: Ընդ որում, ագրեսիվ վարքը դրսևորվում է ոչ միայն բացահայտորեն, այլև թաքնված, ծպտված կամ փոխարինված ձևերով: Մարզինալ անձն իր ագրեսիվությունն ուղղում է այնպիսի անձանց կամ օբյեկտների վրա, որոնք առհասարակ կապ չունեն նրա հոգեկանի ֆրուստրացման գործում: Այսինքն՝ ագրեսիայի օբյեկտը փոխարինվում է այլ օբյեկտներով: Դա պատահում է հատկապես այն դեպքերում, երբ ֆրուստրացված անձն ի գորու չէ իր ագրեսիան բացահայտորեն ուղղելու անմիջական ֆրուստրատորին՝ գայրոյթը թափելով պատահական մարդկանց վրա: Նա փնտրում է «քավության նոխսագներ», որոնք լիցքաթափում են նրա լարվածությունը:

Ագրեսիվ վարքի դրսևորման ծայրահեղ ձևերից է խռովությունը, որը կապված է ոչ միայն գոյություն ունեցող հասարակական-քաղաքական իրողությունների չընդունման, այլև դրանց բռնի հեղաշրջման հետ: Հաշվի չառնելով օբյեկտիվ հանգամանքները՝ մարզինալ անձը կամ խմբերը, որոնցում, որպես կանոն, մեծ թիվ են կազմում երիտասարդ մարզինալները, հակահասարակական, հականորմատիվ և սհաբեկչական տարաբնույթ գործողությունների միջոցով փորձում են կազմալուծել հասարակական կառուցվածքները, վերափոխել իրականությունը: Խռովությունը մարզինալ անձանց բնորոշ արկածախնդրական ռազմավարության կիրառման ձև է: Վարքի միասնական դրդապատճառայնություն և արժեքների ընդհանուր

համակարգ ունեցող հասարակության համար հարմարման խոտվարարական տիպն այնքան էլ բնորոշ չէ, մինչդեռ անցումային հասարակությունների համար, ուր անումիան սովորական վիճակ է, հասարակական հարաբերությունների մեջ ներառման խոտվարարական, ծայրահեղական եղանակը դառնում է բավականին տարածված սոցիալական երևույթ:

Թեև խոտվորությունը հարմարման զանգվածային ձև չէ, այնուհանդերձ, փաստ է, որ մարզինալ մարդիկ, հատկապես երիտասարդները, աչքի են ընկնում իրենց ագրեսիվ վարքով, հակված են դեպի բռնությունը: Ավելի ստույգ, նրանք հոգեբանորեն պատրաստ են բռնություն գործելու, թեև իրականում կարող են այդ քայլին չդիմել: Սոցիալական և միջէթնիկական լարվածության պայմաններում մեծանում է ագրեսիվության դրսևորման հնարավորությունը: Ինչպես նկատում է Լ.Յ.Գոզմանը, նման դեպքում կարևոր է ոչ թե մարդու՝ բռնություն գործելու պատրաստականությունը, այլ նրա վերաբերմունքը բռնություն գործողների հանդեպ [11]:

Անցումային շրջանում լայն տարածում են գտնում նաև հարմարման մյուս տիպերը՝ ինքնավերափոխումն ու փախուստը իրականությունից: Եթե մարդը չի կարողանում փոխել իրականությունը կամ հարմարվել իրականությանը, ապա մնում է վերջին տարբերակը՝ ինքն իրեն փոխել: «Մարդն ի վիճակի չէ փոխել աշխարհը, բայց դա իրեն ձեռնտու չէ, և նա իր գլխում է փոխում աշխարհը» [12]: Նման դեպքում մարդը կարող է կորցնել սեփական արժեքի կամ իրեն շրջապատող աշխարհի արժեքի զգացողությունը:

Անցումային շրջանում մարզինալ գիտակցության ու վարքի դրսևորման ձևերից է դառնում անցյալի իդեալականացումը: Մարզինալ անձինք հաճախ են դիմում պաշտպանական այդ մեխանիզմին: Դա առավելապես բնորոշ է այն մարդկանց, ովքեր սոցիալականացման փուլերն անցել են նախկին հասարակարգում՝ նորում վերածվելով տարիքային մարզինալների: Որպես կանոն, մեծահասակները դժվարությամբ են հաշտվում իրենց նոր դերերի և կարգավիճակների, ավանդական նորմերի և արժեքների կորստի հետ: Նրանք հատկապես ծանր են տանում իրենց նկատմամբ հասարակական կարծիքի փոփոխությունը՝ ձևավորվող անտարբեր վերաբերմունքը: Չկարողանալով հարմարվել նոր պայմաններին՝ տարիքային մարզինալներն իրենց զգում են ավելորդ և ոչ պիտանի: Միայնությունը, մեկուսացվածությունը, ավելորդության զգացումը, ցածր կենսամակարդակը ստեղծում են սթրեսային ծանր իրավիճակներ, որոնց քչերն են կարողանում դիմակայել:

Այս խմբին պատկանող մարզինալը գունագարդում է ոչ վաղ անցյալի սոցիալական հարաբերությունները, նախորդ սոցիալ-քաղաքական համակարգին վերագրում է այնպիսի առաքինություններ ու արժանիքներ, որոնք իրականում չեն եղել կամ եղել են մասամբ: Մարզինալ մարդը տառապում է



անցյալի կարոտախտով: Նման մարդիկ կիրառում են այնպիսի հոգեբանական պաշտպանական մեխանիզմ, ինչպիսին է ռեգրեսիան (հոգեբանական նահանջը): Նրանց գիտակցության մեջ վերականգնվում կամ ակտիվանում են նախորդ շրջանում իրենց ապրած կյանքին բնորոշ կարծրատիպերը: Հոգեբանական նահանջն իրականությունից փախչելու մի ձև է, որը մասամբ մեղմում է մարզինալ անձանց հոգեկան լարվածությունը: Նման մարդիկ, որպես կանոն, համակրում են այն քաղաքական ուժերին, որոնք հանդես են գալիս անցյալին վերադառնալու, անցյալի համակարգը վերականգնելու կոչերով:

Ամփոփելով վերը շարադրվածը՝ կարող ենք ասել, որ անցումային հասարակությունում մարզինալության զանգվածային դրսևորումների նպաստավոր պայմաններ են ստեղծվում, որոնք համընդհանուր անիշխանության պայմաններում կարող են բացասաբար ազդել ինչպես հասարակական կյանքի, այնպես էլ մարդկանց հոգեկանի զարգացման վրա: Նման վտանգավոր զարգացումները կանխելու, այսինքն՝ մարզինալացման գործընթացները կարգավորելու և վերահսկելու, մարզինալացումը հաղթահարելու համար կարևոր է դառնում պետության ակտիվ և ճկուն սոցիալական քաղաքականությունը:

*Ապրիլ, 2005թ.*

### Աղբյուրներ և գրականություն

1. *Попова И.П.*, Новые маргинальные группы в Российском обществе (теоретические аспекты исследования), Социологические исследования, 1999, 7, с. 62.
2. *Ольшанский О.В.*, Политическая психология, М., 2002, с. 310.
3. «На изломах социальной структуры», М., 1987, с. 7.
4. *Садков Е.В.*, Маргинальность и преступность, Социологические исследования, 2000, 4, с. 43.
5. *Закарян С.*, История философии, Ереван, 2000, с. 319-328.
6. *Stonequist E.V.*, The marginal man. A study in Personality and Culture Conflict, N.Y., 1961, pp. 92-93.
7. *Mancini B.J.*, No owner of soil: The concept of marginality revisited on its sixtieth birthday, International review of modern sociology, New Delhi, 1988, Vol. 18.
8. *Стариков Е.Н.*, Социальная структура переходного общества (опыт инвентаризации), Полис, 1994, 4.
9. *Фромм Э.*, Ради любви к жизни, М., 2000, с. 33.
10. *Налчаджян А.А.*, Социально-психическая адаптация личности (формы, механизмы и стратегии), Ереван, 1988, с. 32-44.
11. *Гозман Л.Я.*, Психология перехода, Вопросы философии, 1995, #5, с. 21.
12. *Дерманова И.Б.*, Типы социально-психологической адаптации и комплекс неполноценности. //Вестник Санкт-Петербургского университета. Серия 6. Вып. 1, /6/, с. 65.

## МАРГИНАЛЬНОСТЬ КАК ОДНА ИЗ ОСНОВНЫХ ХАРАКТЕРИСТИК ТРАНСФОРМИРУЮЩЕГОСЯ ОБЩЕСТВА

*Наира Акопян*

Резюме

Всестороннее изучение маргинальности как многослойного социокультурного и социально-психологического явления становится насущным и современным в преобразующихся обществах, где в результате проведения политических, экономических, социальных и культурных реформ распадаются все, в прошлом стабильные общественные структуры, система социальных отношений и их элементы: социальные институты, социальные группы и индивиды оказываются в пограничном, промежуточном, переходном состоянии. Разрушение социокультурных, идеологических, политических и экономических основ жизни, неопределенность и неизвестность создают благоприятную почву для возникновения явления массовой маргинализации. В определенном смысле маргинальность становится одной из основных характеристик преобразующегося общества. Один из важных, если не главный, фактор возникновения маргинальности в подобных обществах – массовая безработица. Вследствие безработицы не только снижается уровень жизни, но и возникает обнищание народа.

В таких условиях быстро протекает процесс маргинализации почти во всех сферах общества. Его особенностью является то, что маргинальные группы действуют не на периферии социальной деятельности, а повсюду, охватывая почти все сферы жизни. Если в стабильных обществах маргинальные явления контролируются, в какой-то мере даже регулируются, то в стремительно изменяющихся, переходных обществах процессы маргинализации носят стихийный, непрогнозируемый и неконтролируемый характер.

Во всех случаях в преобразующемся обществе маргинальность как явление имеет широкий охват. Если маргинальность приобретает массовый характер, то ее ценности и установки в той или иной мере проникают в сознание таких людей, которые еще сохраняют свой статус в социальных структурах, то есть еще не потеряли своей социальной идентификации.

Политические и экономические преобразования сопровождаются изменениями социально-психологического характера: происходит переоценка ценностей, обесцениваются мировоззренческие установки, меняются стереотипы, начинаются поиски смысла жизни, происходит дегуманизация межличностных отношений, изменение социального статуса, положения и поведенческой роли в обществе. В результате имеет место кризис социальной идентификации, проявляющийся в том, что человек утрачивает положительное восприятие своей социальной принадлежности.